




Alþingi
Erindi nr. P 133/135
komudagur 13.11.2006

Alþingi, 8. nóvember 2006.

Fjárlaganefnd Alþingis.
Hr. Birkir Jón Jónsson, formaður.

Vísað er til bréfs yðar, dags. 5. október sl., þar sem óskað er eftir álitum allsherjarnefndar á frumvarpi til fjárlaga fyrir árið 2007. Álit meiri hluta nefndarinnar sendist yður hér með.

F.h. formanns allsherjarnefndar,


Sigrún Brynja Einarsson, nefndarritari.

ALLSHERJARNEFND



Álit

um frv. til fjárlaga fyrir árið 2007 (01 Forsætisráðuneyti og 06 Dóms- og kirkjumálaráðuneyti).

Frá meiri hluta allsherjarnefndar.

Nefndin hefur fjallað um þann kafla fjárlagafrumvarpsins sem er á málefnasviði hennar, sbr. 2. mgr. 25. gr. laga nr. 55/1991, um þingsköp Alþingis, og bréf fjárlaganefndar frá 5. október 2006.

Á fund nefndarinnar komu Óðinn Helgi Jónsson og Halldór Árnason frá forsætisráðuneyti og Ragna Árnadóttir og Jónas Ingi Pétursson frá dóms- og kirkjumálaráðuneyti.

Heildargjöld forsætisráðuneytis árið 2007 eru áætluð um 1190 millj. kr. á rekstrargrunni. Frá dragast sértekjur að fjárhæð 29 millj. kr., en þær nema 2,4% af heildartekjum ráðuneytisins. Rekstrargjöld ráðuneytisins að frádrögnum sértekjum eru áætluð 725 millj. kr. og hækka um 5 millj. kr. frá fjárlögum þessa árs að meðtöldum launa- og verðlagsbótum.

Heildargjöld dóms- og kirkjumálaráðuneytis árið 2007 eru áætluð tæplega 22 millj. kr. á rekstrargrunni. Frá dragast sértekjur nálægt 1,3 millj. kr., en þær nema 5,9% af heildartekjum ráðuneytisins. Rekstrargjöld ráðuneytisins að frádrögnum sértekjum eru áætluð um 15,7 millj. kr. og hækka um tæplega 1,9 millj. kr. frá fjárlögum þessa árs að meðtöldum launa- og verðlagsbótum..

Meiri hlutinn fagnar því að í fjárlagafrumvarpinu er gert ráð fyrir rúmlega 500 millj. kr. hækkun til Landhelgisgæslunnar sem ætluð er til kaupa á varðskipi og eftirlitsflugvél. Þetta er í samræmi við stefnumörkun þess efnis að þremur milljörðum króna af söluandvirði Landssímans skuli varið til slíkra kaupa eins og fram kom í álit meiri hluta nefndarinnar til fjárlaganefndar um frumvarp til fjárlaga fyrir árið 2006. Framlag til viðhalds hækkar jafnframt um 30 millj. kr. í tengslum við eflingu þyrlusveita Landhelgisgæslunnar í kjölfar brotthvarfs þyrlusveitar varnarliðsins. Í fjárlagafrumvarpinu kemur fram að sú 500 millj. kr. fjárhæð sem þar er tilgreind byggist á kostnaðaráætlun síðan snemmsumars sem sé nú til endurskoðunar og gert er ráð fyrir að lokið verði fyrir 2. umræðu frumvarpsins. Meiri hlutinn telur brýnt að endanlegar tölur liggi fyrir á þeim tímapunkti og að þessi áætlun standist.

Sem fyrr leggur meiri hlutinn áherslu á fjárveitingar til fangelsismála. Í frumvarpinu er gert ráð fyrir að lokið verði við framkvæmdir við endurbætur og stækkun fangelsanna á Kvíabryggju og á Akureyri á næsta ári og að veitt verði til þess um 100 millj. kr. Þá er gert er ráð fyrir því í frumvarpi til fjárukalaga fyrir árið 2006 að fjármunir verði veittir til að hefja frumathugun á framkvæmdumvið fangelsið á Litla-Hrauni og við byggingu nýs fangelsis á Hólmsheiði. Meiri hlutinn leggur áherslu á mikilvægi þess að þessi áform nái fram að ganga sem fyrst og hvetur til þess að þeim verði flýtt eftir fremsta megni.

Í tengslum við stofnun embættis lögreglustjórans á höfuðborgarsvæðinu er gert ráð fyrir fjárveitingu sem nemur nánast 2,9 millj. kr. Sú fjárveiting eru að fullu millifærð frá öðrum fjárlagaliðum vegna millifærslu verkefna. Meiri hlutinn fagnar þeirri hagræðingu sem fyrirséð er að hljótist af nýskipan lögreglumála og tilfærslu verkefna milli stofnana, en lögregluumdæmum fækkar um 11 og embætti sýslumanna sem ekki fara með lögreglustjórn verða 11 talsins. Með þessum breytingum skapast einnig svigrúm fyrir sýslumenn til að taka að sér önnur verkefni sem vel fer á að þeir sinni, sbr. frumvarp um flutning verkefna frá dóms- og kirkjumálaráðuneyti til sýslumannsembætta sem nú er til meðferðar hjá nefndinni. Þá bendir nefndin á að embætti sýslumannsins á Keflavíkurflugvelli færist undir dóms- og kirkjumálaráðuneyti í stað utanríkisráðuneytis áður, en það embætti hefur verið rekið með halla undanfarin ár. Meiri hlutinn leggur áherslu á að búið verði að greiða úr fjárhagsvanda embættisins áður en það flyst yfir til dóms- og kirkjumálaráðuneytis þannig að ráðuneytið taki við embættinu án halla.

Bjarni Benediktsson og Drífa Hjartardóttir skrifa undir álit þetta með fyrirvara vegna setu í fjárlaganefnd.

Alþingi, 8. nóv. 2006.

Bjarni Benediktsson,
form., frsm.

Birgir Ármannsson.

Dagný Jónsdóttir.

Drífa Hjartardóttir.
